



PAS DE DRE, PAS DE LIBERTA...

Lou Counsèu coustitucionau fai lume sus l'apartenènci di lengo regionalo au patrimòni de la Franço...

Pajo 2

Prouvènço aro

Jun 2011

n° 267

2,10 €

Astrid

L'eleicioun se perseguis despièi abriéu 1930, qu'èro lou cinquanten anniversari de la neis-sènço de Frederi Mistral: Angèlo Vernet (1930-1947) fuguè la proumièro rèino.

Acetado e recouneigudo pèr lis elegi e lis estajan dóu Païs d'Arle, es la representanto úficialo de la lengo, dis us e di tradicioun dóu pople prouvençau.

Emé si damisello d'ounour, soun l'image de nosto jouinesso.

Ounourant nòsti tradicioun, fièro de soun identita arlatenco, asseguron un role publi: esbléugisson de sa bèuta li ceremouniè úficialo. Soun lis embassadriço de noste terraire en Franço e à l'estrangié.

Li candidato au titre de Rèino d'Arle e de Damisello d'Ounour dèvon èstre:

- 1/ de naciounalita franceso
- 2/ nascudo en Arle, o de parènt nascu en Païs d'Arle
- 3/ resta en Arle vo en Païs d'Arle.

La candidatura s'acoumpagno d'uno letro de moutivacioun manuscricho, d'un retra en civil e d'uno fotò en pèd, en costume d'Arlatenco.

Dèvon aguè de 18 an au mens e de 24 an au mai, lou jour de l'eleicioun.

Dèvon èstre celibatari e lou resta tout lou tèms dóu reinage, que duro 3 annado. Dèvon aguè uno bello cabeladuro pèr carga la couifo arlatenco.

Dèvon aguè uno culturo generalo, saupre l'istòri e lou patrimòni arlaten, counèisse la literaturo prouvençalo, lis us e coustumo dóu Païs d'Arle e de Prouvènço.

Dèvon mestreja la lengo nosto fin de pousqué l'utilisa dins uno counversacioun courrènto.

Dèvon tambèn se couifa e se vesti eisadamen en costume arlaten.

Dèvon enfin saupre mounta en grupo darriè un cavaliè pèr participa à-n-uno manifestacioun.

Lou 1iè mai 2011 la jurado designè la 21enco Reine d'Arles e si Damisello d'Ounour.

La jurado, soute la presidènci d'Ubert Yonnet, Presidènt de la Counfrarié di Gardian, èro coumpausado de Silvio Ariès, jornalista, Sabino Mistral, Nicolo Niel, especialisto dóu costume, Douminico Serena-Allier, counservatriço dóu Museon Arlaten, Gui Chaptal, Capitani de la Nacioun Gardiano, Roumié Venture, qu'es pas la peno de presenta.

En la 499enco annado de la Counfrarié di Gardian, la jurado a designa Astrid Giraud coume rèino d'Arle e si damisello d'ounour soun Julia Berizzi, Laura Cavallini, Charloto Deplancke e Angelico Marignan

L'intronisacioun de la 21ème Rèino d'Arle se debanara lou jour de la Fèsto dóu Coustume, lou dimenche 3 de julièt 2011 au Tiatre Anti d'Arle.

Astrid Giraud manjo dins si 21 an, es nascudo en Arle e estúdio lou Dre en Arle. Parlo forço bèn lou prouvençau.

L'an que vèn, sera la rèino di 500 an de la Counfrarié di Gardian, e representara nòsti tradicioun pèr l'annado de Marsiho-Prouvènço 2013.

T. D.

La poulido rèino d'Arle



Li panèu

Lou councours s'acabo, mai la culido dis escripcioun counnùnio.

Pajo 3

Telé Mistral

Uno televisioun en lengo nosto fai flòri à Mandiuel.

Pajo 6

Santo-Estello

Es aquest mes que se debano i Santo dóu 10 au 14 de jun.

Pajo 6



"Assemblage"

Lou meior de la sceno ócitano-prouvençalo recampado li 25 e 26 de jun pèr l'ASSEMBLAGE au Palais Longchamp de Marsiho. La Region Prouvènço-Aup-Costo-d'Azur rènd oumenage à sa culturo, que sa richesso patrimounialo nourris sa creativeta naturalo, en presentant quàuquus un de si meiors artisto, proufessionau e amateur, lou tèms de dos vesprado eicepciounalo au cor de Marsiho. Prougrama pèr la Messioun di Culturo regionalo e de l'Arcade, sus la sceno d'aquelo

"Assemblage" se prouduran entre autre, Moussu T, Lo Cor de la Plana, Sam Karpiana, Nekouda, Enco de Botte, André Chiron, la Capouliero emé un mouloun d'àutris artisto... Aquéli dos vesprado en intrado libro, fan lume sus la diversita de la creacioun ispirado de la culturo d'oc en Prouvènço, di cant di troubadour i musico de vuei, di valèio dóu Piemount e di ribo dóu Rose i porto de la Mediterragno.

Un estand anima pèr lou CREDDO presentara un fube d'obro de la literaturo prouvençalo e ócitano.